

Գլուխ 31

«Վերաներմուծում»

մաքսային ընթացակարգը

Հոդված 235. «Վերաներմուծում» մաքսային ընթացակարգի բովանդակությունն ու կիրառումը

1. «Վերաներմուծում» մաքսային ընթացակարգ՝ օտարերկրյա ապրանքների նկատմամբ կիրառվող մաքսային ընթացակարգ, որին համապատասխան՝ Միության մաքսային տարածքից ավելի վաղ արտահանված այդպիսի ապրանքները ներմուծվում են Միության մաքսային տարածք առանց ներմուծման մաքսատուրքերի, հարկերի, հատուկ, հակազնագցման, փոխհատուցման տուրքերի վճարման՝ պահպանելով ապրանքներն այդ մաքսային ընթացակարգով ձեւակերպելու պայմանները:

2. «Վերաներմուծում» մաքսային ընթացակարգը կիրառվում է Միության մաքսային տարածքից ավելի վաղ արտահանված այն ապրանքների նկատմամբ, որոնց նկատմամբ կիրառվել է՝

1) «արտահանում» մաքսային ընթացակարգը.

2) «մաքսային տարածքից դուրս վերամշակում» մաքսային ընթացակարգը՝ այդ մաքսային ընթացակարգի գործողությունը սույն Օրենսգրքի 184-րդ հոդվածի 1-ին կետին համապատասխան ավարտելու համար.

3) «Ժամանակավոր արտահանում» մաքսային ընթացակարգը՝ այդ մաքսային ընթացակարգի գործողությունը սույն Օրենսգրքի 231-րդ հոդվածի 1-ին կետին համապատասխան ավարտելու համար:

3. «Վերաներմուծում» մաքսային ընթացակարգով ձեւակերպված ապրանքները ձեռք են բերում Միության ապրանքների կարգավիճակ՝ բացառությամբ սույն Օրենսգրքի 236-րդ հոդվածի 4-րդ կամ 5-րդ կետերում նշված ապրանքների եւ սույն Օրենսգրքի 176-րդ հոդվածի 3-րդ կետի 1-ին ենթակետում նշված ապրանքներ հանդիսացող ապրանքների կամ դրանց վերամշակման արդյունքների:

4. «Վերաներմուծում» մաքսային ընթացակարգի կիրառումը թույլատրվում է՝

1) Միության ապրանքների նկատմամբ՝ սույն Օրենսգրքի 207-րդ հոդվածի 6-րդ կետի 2-րդ ենթակետին համապատասխան՝ «ազատ մաքսային գոտի» մաքսային ընթացակարգի կամ սույն Օրենսգրքի 215-րդ հոդվածի 5-րդ կետի 2-րդ ենթակետին համապատասխան՝ «ազատ պահեստ» մաքսային ընթացակարգի գործողության ավարտի համար.

2) «մաքսային տարածքից դուրս վերամշակում» մաքսային ընթացակարգով ձեւակերպված՝ անհատույց (երաշխիքային) վերանորոգման նպատակով Միության մաքսային տարածքից արտահանված ապրանքների վերամշակման արդյունքների նկատմամբ՝ բացառությամբ սույն Օրենսգրքի 184-րդ հոդվածի 1-ին կետի երկրորդ պարբերությունում նշված վերամշակման արդյունքների:

5. «Վերաներմուծում» մաքսային ընթացակարգի կիրառումը չի թույլատրվում սույն Օրենսգրքի 201-րդ հոդվածի 6-րդ կետի վեցերորդ պարբերությունում եւ 211-րդ հոդվածի 3-րդ կետի յոթերորդ պարբերությունում նշված դեպքերում:

Հոդված 236. Ապրանքները «վերաներմուծում» մաքսային ընթացակարգով ձեւակերպելու պայմանները

1. Ապրանքները «վերաներմուծում» մաքսային ընթացակարգով ձեւակերպելու պայմաններ են՝

1) արգելքների եւ սահմանափակումների պահպանումը՝ սույն Օրենսգրքի 7-րդ հոդվածին համապատասխան.

2) Միության մաքսային տարածքից ապրանքների արտահանման հանգամանքների, վերանորոգման գործողությունների վերաբերյալ տեղեկությունները ներկայացնելը մաքսային մարմին, եթե այդպիսի գործողություններն ապրանքների հետ իրականացվել են Միության մաքսային տարածքի սահմաններից դուրս եւ հաստատվում են մաքսային եւ (կամ) այլ փաստաթղթերի կամ այդպիսի փաստաթղթերի վերաբերյալ տեղեկությունները ներկայացնելով.

3) ապրանքների առանձին կատեգորիաների նկատմամբ սույն հոդվածի 2-5-րդ կետերով սահմանված այլ պայմաններ:

2. Միության մաքսային տարածքից ավելի վաղ արտահանված ապրանքները, որոնց նկատմամբ կիրառվել է «արտահանում» մաքսային ընթացակարգը, «վերաներմուծում» մաքսային ընթացակարգով ձեւակերպելու պայմաններն են՝

ապրանքների ձեւակերպումը «վերաներմուծում» մաքսային ընթացակարգով՝ Միության մաքսային տարածքից դրանց փաստացի արտահանման օրվան հաջորդող 3 տարվա ընթացքում կամ սույն կետի հինգերորդ պարբերությանը համապատասխան սահմանված այլ ժամկետում.

ապրանքների այն վիճակի անփոփոխ պահպանումը, որում դրանք արտահանվել են Միության մաքսային տարածքից՝ բացառությամբ բնական մաշվածության հետեւանքով առաջացած փոփոխությունների, ինչպես նաեւ փոխադրման (տրանսպորտային փոխադրման) եւ (կամ) պահպանման կանոնավոր պայմաններում բնական կորստի հետեւանքով առաջացած փոփոխությունների.

հարկերի եւ (կամ) դրանցից տոկոսների փոխհատուցումը, երբ այդպիսի հարկերի գումարները եւ (կամ) տոկոսները, կապված Միության մաքսային տարածքից ապրանքների արտահանման հետ, չեն վճարվել կամ վերադարձվել են, ինչպես նաեւ Միության մաքսային տարածքից ապրանքների արտահանման հետ կապված՝ չվճարված կամ որպէս վճարումներ, արտոնություններ կամ փոխհատուցումներ՝ ուղղակիորեն կամ անուղղակիորեն ստացված այլ հարկերի գումարների, լրավճարների եւ այլ գումարների փոխհատուցումը, եթէ դա նախատեսված է անդամ պետությունների օրենսդրությամբ, այն կարգով եւ պայմաններով, որոնք սահմանված են այդպիսի օրենսդրությամբ:

Ապրանքների առանձին կատեգորիաների նկատմամբ Հանձնաժողովն իրավունք ունի սահմանելու սույն կետի երկրորդ պարբերությունում նշված ժամկետը գերազանցող ժամկետ:

3. Միության մաքսային տարածքից ավելի վաղ արտահանված ապրանքները, որոնց նկատմամբ կիրառվել է «ժամանակավոր արտահանում» մաքսային

ընթացակարգը, «վերաներմուծում» մաքսային ընթացակարգով ձեւակերպելու պայմաններն են՝

1) ապրանքների ներմուծումը Միության մաքսային տարածք «ժամանակավոր արտահանում» մաքսային ընթացակարգի գործողության ժամկետի ընթացքում.

2) ապրանքների այն վիճակի անփոփոխ պահպանումը, որում դրանք արտահանվել են Միության մաքսային տարածքից՝ բացառությամբ բնական մաշվածության հետեւանքով առաջացած փոփոխությունների, ինչպես նաեւ փոխադրման (տրանսպորտային փոխադրման) եւ (կամ) պահպանման կանոնավոր պայմաններում բնական կորստի հետեւանքով առաջացած փոփոխությունների, ինչպես նաեւ այն փոփոխությունների, որոնք թույլատրվում են այդպիսի ապրանքների նկատմամբ «ժամանակավոր արտահանում» մաքսային ընթացակարգին համապատասխան դրանք օգտագործելիս:

4. Միության մաքսային տարածքից ավելի վաղ արտահանված ապրանքները, որոնց նկատմամբ կիրառվել է «մաքսային տարածքից դուրս վերամշակում» մաքսային ընթացակարգը, «վերաներմուծում» մաքսային ընթացակարգով ձեւակերպելու պայմաններն են՝

1) ապրանքների ներմուծումը Միության մաքսային տարածք «մաքսային տարածքից դուրս վերամշակում» մաքսային ընթացակարգի գործողության՝ մաքսային մարմնի կողմից սահմանված ժամկետի ընթացքում.

2) ապրանքների այն վիճակի անփոփոխ պահպանումը, որում դրանք արտահանվել են Միության մաքսային տարածքից՝ բացառությամբ բնական մաշվածության հետեւանքով առաջացած փոփոխությունների, ինչպես նաեւ փոխադրման (տրանսպորտային փոխադրման) եւ (կամ) պահպանման կանոնավոր պայմաններում բնական կորստի հետեւանքով առաջացած փոփոխությունների:

5. Ապրանքների վերամշակման արդյունքները, որոնց նկատմամբ կիրառվել է «մաքսային տարածքից դուրս վերամշակում» մաքսային ընթացակարգը, «վերաներմուծում» մաքսային ընթացակարգով ձեւակերպելու պայմաններն են՝

1) «մաքսային տարածքից դուրս վերամշակում» մաքսային ընթացակարգով ձեւակերպված ապրանքների արտահանումը Միության մաքսային տարածքից՝ դրանց անհատույց (երաշխիքային) վերանորոգման նպատակով.

2) վերամշակման արդյունքների ձեւակերպումը «վերաներմուծում» մաքսային ընթացակարգով «մաքսային տարածքից դուրս վերամշակում» մաքսային ընթացակարգի գործողության՝ մաքսային մարմնի կողմից սահմանված ժամկետի ընթացքում:

6. «Վերաներմուծում» մաքսային ընթացակարգով ձեւակերպվող ապրանքների հայտարարատու կարող է հանդես գալ սույն հոդվածի 2-5-րդ կետերում նշված այն մաքսային ընթացակարգերից որեւէ մեկով ձեւակերպված ապրանքների հայտարարատու հանդիսացած անձը, որին համապատասխան ապրանքներն արտահանվել են Միության մաքսային տարածքից:

**Հոդված 237. Արտահանման մաքսատուրքերի գումարների վերադարձը
(հաշվանցումը)**

Սույն Օրենսգրքի 236-րդ հոդվածի 2-րդ կետում նշված ապրանքների համար, որոնք ձեւակերպվել են «վերաներմուծում» մաքսային ընթացակարգով, կատարվում է արտահանման մաքսատուրքերի վճարված գումարների վերադարձ (հաշվանցում)՝ պայմանով, որ նշված ապրանքները «վերաներմուծում» մաքսային ընթացակարգով ձեւակերպվել են այդպիսի ապրանքներն «արտահանում» մաքսային ընթացակարգով ձեւակերպելու օրվան հաջորդող օրվանից 6 ամսից ոչ ուշ:

Եթե ապրանքներն «արտահանում» մաքսային ընթացակարգով ձեւակերպելիս կիրառվել են ապրանքների մաքսային հայտարարագրման՝ սույն Օրենսգրքի 104-րդ հոդվածի 8-րդ կետով, 116-րդ եւ 117-րդ հոդվածներով նախատեսված առանձնահատկությունները, ապա «վերաներմուծում» մաքսային ընթացակարգով ձեւակերպված այդպիսի ապրանքների համար կատարվում է արտահանման մաքսատուրքերի վճարված գումարների վերադարձ (հաշվանցում)՝ պայմանով, որ նշված ապրանքները «վերաներմուծում» մաքսային ընթացակարգով ձեւակերպվել են այն անդամ պետության՝ մաքսային կարգավորման վերաբերյալ օրենսդրությամբ

սահմանված ժամկետից ոչ ուշ, որի տարածքում ապրանքները ձեւակերպվել են «արտահանում» մաքսային ընթացակարգով: